



# Tir Yimyim


www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



TAPAK 8

Wagner teloki sorkar anema  
nokdakba mechi General Sergei

Caroline Wozniacki ano  
tanaben asaya tenzüksü



VOL. XX NO. 257 (ADOK 257) DIMAPUR ROGONÜ (FRIDAY)

AAMI (JUNE) 30, 2023

₹ 5.00

## Ajaki CoR tezüngzüktep akumtsübotsüla: FNR

**Dimapur, Aami/June 29 (TYO):** Covenant of Reconciliation (CoR) nung meyongnem agüja alir dang Forum for Naga Reconciliation (FNR) ajanga iba tayongzükbaga agütsür. CoR züluteper June 13, 2023 nü küm 14 jungogo, koba ajanga Naga political groups balala tsüingta azüdokshitepba anenba nung shilem tajung agia liasü. June 13, 2009 sülen meyongnem agütsür temi CoR ya ponguben tashi akangshia liasü. Aser tesüabaji September 14, 2022 nü Sovima nung züluteper aser iba mapang "...telemsa adoktsüsa jembishinüba, bilemba aser agenda tem nungi pila alitsü. Iba amala yimya tekeratiba nung tembangtsüla" ta pangjemtepa liasü, ta FNR sangdong ajanga ashi.

Iba pangzüng ya arok ajungtsü asoshi renemba lir. Asenoki September 14, 2022 nü renema aliba yimya amshitsü nüngdaker aser Naga nungger lokti tentet, arogo aser state sorkari bukuma nokdaktsüla. Talisa January 14, 2023 nü NNPGs aser NSCN tsüingta tezüngzüktep yangluba ya terenlok akaba sayur. Ibai kija aser lokti shingia mashi lenman nung mamshitsüla, meraksatsüla aser maitoktsüla, ta FNR sangdong ajanga ashi.

Naga Political Groups, kija mesüra lokti ajanga dang asen meimchir indang arok temeden raksatsüsa aser menentsüsa azüdokshi mapa meinyaktsü aser o mejembitsü FNR ajanga ayongzüker, ta ashi.

## Rahul Gandhi-i chopper ung Churachandpur atong

**Guwahati, Aami/June 29 (Agencies):** Police temi lendong ataloktsü tetsübo nung Bishnupur tesem nung soitba sülen Congress lenir Rahul Gandhi ya chopper ka nung mener Brehostibar nikongdang Manipur kübok Churachandpur tonga liasü.

Pa indang convoy nung lendong agütsütsü tsübooba agi police temi Imphal nungi kilometer 20 shi pilar Bishnupur nung Gandhi aser pa meina arurtem soita liasü.

Osang ajanga ashiba agi, state sorkari agütsüba chopper ka amshia Rahul Gandhi-i Churachandpur semdang. Iba helicopter nung pa meina police

tanishir aser administration ketdangsurtem oa liasü.

Manipur nung hopta aika rongrongshirong aser azüdokshi tensa tamajungtuba ajurua aliba Churachandpur atongba sülen Gandhi-i relief camp tem semdanga tensa asadanga pei ki yutsür arua jenoka alirtem den sensaksem kaa liasü.

"Manipur nung kü adianu aser adianutsür ajak nungi timtem lemsatepba angatsü atema ni aru. Kin ajanga nungi nüburtemi pelashishia agizük. Sorkari ni soitba ya tia maka. Manipur nung taneptsü nüngdaker. Asenok asoshi tongtipangtibaji yimjung tesunep lir," ta Gandhi-i tweet ka nung ashi.

## UCC nung Naga nungger asoshi timtem lir: NDPP

**Dimapur, Aami/June 29 (TYO):** Uniform Civil Code (UCC) mapa kuma amshitsü asoshi asadangtsü atema Government of India-i tentetba 22nd Law Commission of India ajanga June 14, 2023 nü sangdongba dak sendakba nung Nationalist Democratic Progressive Party (NDPP) tangatetba lemsatepa liasü.

NDPP sangdong ka ajanga ashiba agi, UCC mapa kuma amshiba ajanga India nung aliba kin tilatem aser tenem nung alirtem (tribal) indang temeden nung timtem ajurutsü ta angateter. Anatsülen nungi political agreement ka zülutepba ajanga Nagaland ya Indian Union nung state 16 buba akum aser Government of India-i Naga nungger timtemba aser puti otsü angateta state tejangja ka akum. Constitution of India nung Article 371 (A) inokba ajanga asen Naga nungger sobaliba aser yimsü wazüka ayur, ta NDPP ajanga ashi.

Ano yimjung aser ajaki akumtsübotsüsa Indo-Naga yimten ken o jembia aruba tongtipang lemjem ka nung lir. Anungji iba ama mapang ka nung UCC ama ozüing benoktsü ya shisa maka, koba ajanga küm 26 tashi yimten ken o jembia aruba nung timtem tulu ajurutsü. Mapang talangka mepetmesü aser

azüdokshi ajangshia arur tanü Naga nunggeri teti asoshi yimjung aginer. Ajisüaka ozüing tasen benokba ajanga nüburtem indang 'personal laws' nung kongshia ano tali ang tejangja makaba jenjangi yoktsü aser tesunep samatsütsü akok, ta NDPP sangdong ajanga ashi.

Constitution of India nung wazüka aliba aser Preamble nung shia aliba ama, India ya Secular Democratic Republic lir, kong tesendaktep temaba jenjangi ajungkettsü, nisung kija shia akumtsübotsü, aser linük ajanga ka kuma lungjemtsü nangzüka lir. Kin telemsa balala tsüingta telungjem nung aliba ya India indang maitsü ka lir, aser asenok ya sentsü aser tabu balala aliba naro tebong tebour tajung ka ama repranger, aser asen linük ya sobaliba aser yimsüyimbong balala amshiba nüburtemi kumtetba lir, anungji nübur ajanga asoshi civil code benokba ajanga linük nükjidong nung temetetba timtem ajurutsü, ta ashi.

Iba ya ajanga temetetba telemsa adokdaktsütsü aser ibaji linük ka kuma lungjemtsü asoshi majung asütsü. Iba dak alia linük nung kin aika Indian Union den temolungsentüsü ka kuma melungjemtetli lir. Item nüburtemi tang tashi mainland nung amshiba yimsü, sobaliba aser tamangba

yimsü ya khenyongi balaka ama züingshir, ta NDPP ajanga ashi.

Indian Constitution tamendak dak federalism ya shilem ka lir, aser ibaji kodanga memelenshitsüla mesüra meraksatsüla aser India tangatetba ya kin ajak akumtsübooba, aremzüktepa tamangba yimsü ajanga agizüktetba nung amendaka lir.

Anungji item kuli ajak asadanger asen nübur temeden, sobaliba aser yimsüyimbong wazüka ayutsü tangatetba aliba political party ka ama NDPP-i UCC maka kuma amshitsü memolunger.

Anungji UCC asangsang nung amshitsü asoshi inyakyim tang ang tenzüker asünung, NDPP ajanga Government of India aser 22nd Law Commission züingsemtem dang iba ken o asadangshitsü aser 21st Law Commission telemtetba memelenshitsü ajungshir, ta NDPP sangdong ajanga ashi.

Nagaland sorkar tangatetba kodang meshidir, asenoki Naga nungger asoshi bendanga agütsür inyakba manokshitsüla saka akang-akanga nokdaker asen ayak, asen sobaliba, yimsüyimbong aser asen puti otsü wazüka ayutsü Nagaland sorkar dang ayongzüker, ta NDPP sangdong ajangasa ashi.

## WC, NNPGs indang advisor aser lenirtem ayongzüker

**Dimapur, Aami/June 29 (TYO):** Tezülur tejangja maliba nisung kati züluba "UNDERSTANDING THE AILING NAGA GENERATION: WC; NNPGs" nung meyongnem agütsür nisung toku yagi yangji züluba aliba tetetzü shidakba angatet asü masüar ta ni ratar. Temetetba parnoki tejangja memetet alitsü. Parnok indang meyongnem ya tesem kar nungi agiteta malok asütsü, ta Rev. Seksim Kasar, General Secretary, CNC ajanga sangdong ka nung ashi.

Tanü digital lima nung meyongnem agütsür par toku tenüng nung züluba aliba ya parnoki langka karbo meteta alitsü ama mela-mela angatetsü. Ajisüaka article ya ola tulu aser majung aser WC:NNPGs ajanga taa agütsür züludaktsüsang aginüba dang züluba lir. Iba ama tesempatsü otsü yagi maginütsü kar ataloktsüsa yangluba dang sayur. Iba otsü zülusang ya articles tamajung züluba nung nüngtugu akum, ta sangdong ajanga ashi.

"Naga Lima Khrista Asoshi" ta jembiba kong ali ta asüingdangtsü kechi agi na ajungmeso? Nai Tangkhul nungger maginüba

ajanga Tangkhul nungger dak tenük yoker o tamajung zülutsü nü nem temeden magütsü. Tezü atangba agi nü molungjang nung yimsü asür südi. Nai molungsoa India nungger itdangiter indang sepai tajung ka ama na molungsoa meyip nungji, nü indang article nung shia aliba ama asütsü temetet dang. Nü tesayuri ashiba ama nenok molungjang nunga telemsa kanga lir, ta ashi.

WC; NNPGs ajanga tesüsa NSCN lenirtem den FNR lia agreement zülutepba "A Joint Accordant" aser iba sülen "Naga Relationship and Cooperation" nung "Naga nungger puti otsü aser yimtenren temeden nung ajemdaker Naga nungger tejakleni aotsü atema tekeratiba nung asangsang lenmanngtem bushitsü atema" ta züluba lir. Meyongnem agütsür indang shisa (ink) ano makok lir. Parnok ya Alzheimer tashidak agi shiranger asü ta temolung meleme bilemetsüna? Aji mesüra parnok ya nisung kar kübok lir ta yimjak nung sayur dang, ta sangdong ajanga ashi.

Iba article nung nai memetetba mesüra mangatetba aika shia lir. Nai mi den asayatsü akok aser nü temiyong arongtsü.

Saka Tsüingrem denbo tasaya ta shiner.

Nai kechiba CNC dang "Nagalim for Christ kong ali? ta asüingdang. Na aochitsür! Nagalim for Christ ya Tsüingrem indang lir. Ibai enterprise mesüra lokti tentet ka masü! Aji nai memeteta na? Nagalim for Christ ta asüba tetetzü angatetsü merangang. Ibai Tsüingremi Naga nungger asoshi inyakba tesüingmangtsü mapa ka lir. Ibai asenok masodang aser Naga nungger kata Khrista yimsü magizük dang tenzükbaga lir, ta Rev. Seksim Kasar-i ashi.

19 buba century tiyonglen Sibsagar, Assam nung Mission Conference alidang America aser western missionary tem Naga nungger asoshi sarasademtsü dang, "Naga nungger Khrista asoshi, parnok ni shimtetba nüburtem lir" ta America nungger tetsür missionary ka dang tanüla temeshi ajanga sayu.

Anungji parnoki Naga Hills for Christ ta tenüng agütsü aser iba osang sangdongtsü atema Naga limai aru. Anungji na CNC mesüra Rev. Seksim mesüra Naga nungger mesüshir masü

Tsüingrem mesüshir. Tsüingremi dang Nagalim for Christ ta sangdong.

Asenok kumzükbaga, wazüka ayuba aser tanü tashi len aniba atema asenoki Pa dang pelati. Asen sasa asen ya Tsüingremi shimba ta sangdongtsü Pa matsüingdang asenok ya shiba. Pa matsüingdang asenok ya taziungla, temenen nisung lir. Anungji Nagalim for Christ kong ali ta Tsüingrem dang asüingdangtsüji na shiba? Na temenen den adentsü molungtet asünungbo onoki ashitsü kecha maka. Saka shisa kaang aser temenen nungi nü takum kumzüksü merangang. Tsüingrem dangi asemang aser kumzükbaga, ta ajungshir.

Nü shisatsü aziokang aser yimya tajung amshiang, terajem meimchir ama alitsü angazükang, dangar mesüshiba nungi pila alitsü merangang. Nisung aikati na menütsür ta metetang, ta CNC tongti zülur Rev. Seksim-i ashi.

Alima matsüingdang na menütong ka kumogo. Koda tesusatsü! Asenoki junga meshisadangi jembiba o nung temenen lir ta nai memetet? Nai shinga metsübo yonga,

Tsüingrem tsüboang aser nü temenen nangzükbaga, kechiaser mapang ka nü temenen agi na angutsü.

Nagalim for Christ yimyim kübok asenoki tenüng tamajung bener arur ta kodanga tiaüz sangdongtsü temerang. Nü molung mürekang aser tanüingba ajak Tsüingrem nung dokjang, kechiaser Pai shibaji shibar meteta lir.

Tapi agi tamagitsü zülutsü melena CNC den teka amteper azüdokshi agi kongshir alir nem teyari agütsüba nung yaritepba tajungba asütsü. Onoki inyaker saka onok kijai makoker. Asenok külemi lungjemmer inyakra nai atalaba Kukis aser Meiteis aser Nagas, Zomis, Hmars, Baiteis, Vaipheis, Koms, Chirus nungger asoshi mapa tuluka nungger aotsü. Parnok kang kanga mejungi kongshir lir. Arung, ner kidangertem asoshi naia mapang tajung inyaktsü tang ya mapang tajung lir. Kechiba onok den madentsü? Na Khristan masüa na? Na linük meimer masüa na? Nai inyaka aliba anentsü telemtetba agidang Tsüingremi na moajang, ta Rev. Seksim-isa sangdong nung ashi.



## Angh La Ganesan-i kaketshirtem den sensak asem



**Dimapur, Aami/June 29 (TYO):** Nagaland Angh La Ganesan-i June 29 nü Dr. Imkongliba hall, Raj Bhavan, Kohimanung Zeliangrong, Heraka School, Tening School managing Committee züngsemtem aser kaketshirtem den sensaksem sentong ka ayongzüka agiogo.

Sentong nung o jembiba mapang Angh-i, iba school ajanga Assam, Manipur aser Nagaland kübok yimsüing 25 nungi kaketshirtem ajangzüka ngua kanga pelar ta ashi. Paisa, iba school nung azünger kaketshirtem timba tekübokba jenjang nung aliba kibongtem nungi lir aser iba institute nung inyakba tesayurtema honorary social worker tem lir ta ashi.

Pai, iba school mezüing amenokba mapang primary school ka dang liasü saka tangbo high school ka kümogo aser school ajanga Nagaland

dang masü saka Assam aser Manipur nata ajangzüker, ta ashi.

Angh-i ashiba agi, tribal tem lenla ajak nung renlokdahtsüsü asoshi school nükjiding aliba ngua pa kanga pelar.

Maneni Angh-i, kaket shisatsü ajanga sobaliba kümzüka aser wazüka ayutsü atema nüburttem nem tashi agütsüsü ta ashi. Pai ashiba agi, school inyakim ya takdang telung nung sayuba dak dang rangloker malitsüla. Paisa, institution dang personality Development camps, state balala semdanga senzüba, Science tours, State level aser National jenjang nung Children Science Congress nung shilem agiba, Literature tetiktepba ayongzüka, cultural Days amala sentong balala ayongzüka agitsü ajungshia, koba kaketshirtem lenla ajak nung terenlok asoshi tanü educational

system nung shilem ka lir ta ashi.

Angh La Ganesan-i, school nükjidingji kin balala longjemdakja linük tashitaitba kümdaktsüsü asoshi lir, koba tanü kanga nüngdaka lir, ta ashi.

Angh-isa, 2011 nungi küm 13 atonga HSLC tatidang nung school-i 100% pass result ngutetba atema kanga pelaba lemsatop. Iba takok ya kaketshirtem, tesayurtem aser school management-i kanga meranga inyakba kuli lir, ta pai ashi.

Administrator, ZHS, Tening Talmsi Newmai-i, school establishment, nükjiding, takoktem aser inyakim indang metetdaktsü.

Laisa, kaketshirtem ajangzükdaktsüsü atema iba sensaksem sentong ayongzüka atema Angh dang kanga pelaba lemsatopa liasü.

Sentong nung kaketshirtemi sobali tsüingsang aser kentem agi lokti ayongzüka liasü.

## "Role of Young Leaders in Localizing SDGs in Nagaland" training sentong agi



**Kohima, Aami/June 29 (TYO):** Role of Young Leaders in Localizing SDGs in Nagaland dak sendakba nung training tanabuda anogo, Nagaland nung sustainable development ajangzüksü atema rongsenketzüng nung terenlok shilem dak sendakba nung sensaksem ka agia tenzüker.

Sentong nung panelists temi, lenmang tesademba, mapa tajungba, aser ajak nem maongka kasa agütsüsü atema wadang tuluba, ajak anisemtsü aser rongsenketzüng terenlok asoshi Nagaland nung stakeholder tem shilem indang sensaksema liasü.

Iba sentong ya Limabenla Jamir lenisüba nung agi aser o jembirtem rongnung Neichute Doulo, CEO & Founder, Entrepreneurs Associates, Shanavas C, Deputy Commissioner of Kohima, aser Akhum David Longkumer, Asst. Professor Economic, Sriram College of Commerce, Delhi University nung densema liasü.

Sentong nung o jembiba mapang Deputy Commissioner of Kohima Shanavas C, IAS-i, sorkar policy tem akangshitsü atema tongtibang shilem kaji, kati ka den ken o ashishitepba ya lir ta ashiba den lanurtem dang sustainable solutions bener arutsü atema lokti liba nung tebilemdangba meleshia lenmang shidak nung jajatsü ayongzüka liasü. Paisa, local industries, entrepreneurship ajungketsü aser rongsenketzüng terenlok asoshi environment tapet ka yanglutsü atema tasatem indang jembia liasü.

Bushisügang aser kaketshisatsü bushiba dak ajemdaker jembiba mapang Akhum David Longkumer-i, terenlok inyakim aser policy tem decentralization aser communitization asütsü koda tongtibang iba indang jembia liasü. Paisa, "political will ya decentralization atema amshitsüla," ta ashi.

Nagaland nung shishilembaba balala takok ngua amenokba

indang tajangshibatem indang jembiba mapang Neichute Doulo-i, social entrepreneurship koda tongtibang aser Nagaland nung rongsenketzüng nung terenlok asoshi lenmang sadema lapoka aliba indang jembia liasü. Duolo-i, senotsü agi anüingba ya Nagaland nung shishilemba balala metenzükba kuli asü ta asügang. Pai Nagaland nung entrepreneurship tem indang tebilemdangba lemsatop aser lanurtem dang pei tebilemdangba melenshitsü ayongzüker.

Paisa, sorkar tenzükerterem aser nüburttem entrepreneurship aser entrepreneurs dak sendakba nung pei tangatetba melenshitsü nüngdakba lemsatop.

Panel discussion ajanga sentong nung shilem agirtem nem o jembirtem den sensak asemtsü, ken o balala asügang aser rongsenketzüng terenlok aser Nagaland nung SDGs localization renlokba indang angatetsü asoshi maongka nguteta liasü.

## Indian Red Cross Society Chumoukedima District Branch amenokogo

**Dimapur, Aami/June 29 (TYO):** Indian Red Cross Society Chumoukedima District Branch officially amenokogo aser Society indang office DC, Chumoukedima office Complex nung June 27 nü Chairman, Nagaland State Branch, IRCS Abeni TCK-i semzüksüogo. Iba sentong nung Deputy Commissioner Chumoukedima aser General Secretary, Nagaland State Branch natia shilem agia liasü.

Office semzüksüba sentong ya Chumoukedima District Branch IRCS mendenbuba Vichutuolie Mere lenisüba nung agi, Managing Committee züngsem Keviyato Whiso sarasadem aser Treasurer Chumoukedima District Branch IRCS Vekuto Swu-i lokti pela agizüba o jembia liasü.

Sentong nungsa DC aser Chumoukedima District Branch IRCS tir Abhinav Shivam IAS-i o tatsüka jembia, kong pai lokti nung Red Cross koda tongtibang aser iba lokti tentet indang shilem lemsatopa liasü.

Maneni sentong nung Youth Red Cross, Patkai Christian College-i ken tajung ka aten aser General Secretary, Nagaland Satate Branch IRCS Akhale V Khamo-i okilao jembia liasü. Lai Nagaland kübok Districts balala nung Red Cross inyakimtem indang lemsatop aser Red Cross atema senotsü teyari ya tenla ajanga dang agütsür ta ashi.

Nagaland State Branch IRCS mendenbula Abeni TCK Lothai o jembiba mapang Chumoukedima District Branch

tenzüksüba atema kanga pelaba lemsatopba den District Branch Office atema takdang tesadem ka agütsüba asoshi DC Chumoukedima dang kanga pelaba lemsatop. Laisa, tanü alima nung humanitarian maparen koda tongtibang iba indang lemsatopba den Red Cross Society inyakim indang metetdakja liasü.

Iba sentong ya Honorary Secretary Chumoukedima Branch IRCS-i tepela o jembir tembanga liasü.

*Chumoukedima District Branch team tasenba yamai alitsü:*

1. *President : Deputy Commissioner Chumoukedima*
2. *Vice-President: Chief Medical Officer Chumoukedima*
3. *Chairman: Mr. Vichutuolie Mere*
4. *Vice-Chairman: Mr. Kumar Naben*
5. *Honorary Secretary: Mr. Mhiesitsolie Khate*
6. *Treasurer: Mr. Vekuto Swu*

*Managing Committee Members tem :*

1. Mr. Keviyato Whiso
2. Mr. Bendangchuba Ao
3. Mr. Sedevikho Tsukru
4. Mr. Kuzuto Yephthomi
5. Mr. Niuto Chishi
6. Mr. Khrietuo Yhoshu
7. Mr. Talimeren Imsong
8. Dr. Premkumar Singh
9. Mr. Kivikhe Zhimomi

Kasa mapang nung Nagaland State Branch-ia, branch tasenba nem relief Material aika agüja liasü.

## H&FW aser CURE INDIA na tenangzüktepba yanglushi



*The Health & Family Welfare Department aser Cure International India Trust na ano küm pongu atema tenangzüktepba yangluogo, koba June 28, 2023 nungi June 28, 2028 tashi asütsü.*

**Dimapur, Aami/June 29 (TYO):** Health & Family Welfare Department aser Cure International India Trust (CURE INDIA) nati ano küm pongu atema tenangzüktepba yanglushiogo, koba June 28, 2023 nungi June 28 2028 tashi asütsü.

Tenangzüktepba yangluba mapang Commissioner & Secretary, HFW, Y. Kikheto Sema, IAS-i CURE INDIA dang kanga pelaba lemsatop, kechiyong iba kübok tanur 93 dak tema züngoksema lir aser foot abduction braces den küm pongu atema rehabilitation

densema Clubfoot management ponseti method agütsüdar, ta ashi.

Sema-isa, Nagaland nung iba inyakim ajanga club foot keta aliba nüngdaka aliba tanurtem nem teyari agütsüsü imlaba lemsatopba den club foot ajanga lemtalemria kümdaktsüba agintsü asoshi nükjiding yur aliba ataloktsü atema maneni inyaktsü yongya ataba lemsatopa liasü.

Tenangzüktepba nung Commissioner & Secretary, H&FW, Y. Kikheto Sema, IAS aser Director CURE INDIA, Santosh George nati sign süa liasü.





June 29, 2023 nü New Delhi nung aliba Jama Masjid kima Muslim nungertem Eid benjung amongdang police officer kati Muslim nunger tanur ka ajunga aliba noksa nung angur.

### India-i BRICS linüktem dang climate change atema inyaksü ayonger

**New Delhi, Aami/June 29 (Agencies):** Union Minister of Environment, Bhupender Yadav-i Brics linüktem dang, alima kümzüksü atema climate change asoshi kanga rongdak süa mera agir meranga inyaksüla, ta ayongzük.

Bodhbarnü New Delhi nung 9buba Brics Environment Minister tem senden nung jembidang Bhupender Singh-i iba o ya metetdaksü.

'Advancing Environmental Cooperation amongst Brics towards attainment of 2030 Agenda for Sustainable Development' omen nung

ajemdaker agiba senden ya South Africa leniba nung video conferencing ajanga ayongzüka agi.

India tenüng nung jembidang Environment, forest & climate change Union Minister, Bhupender Yadav-i, 2018 küm July ita nung sign asüba MoU 'Implementation Plan of the Brics Environment' ya Brics linüktemi shisatsü, osangtsüsang aser tangatetba balala lemsatepba sabang ka ama amshitsü akok, ta ashi.

Bhupender Yadav-isa climate change, tzü-mopung menenba aser arem shiruru

samaba nungi kümzüksü atema India-i inyakba mapatem metetdaksüba den külemi Ato kilonser, Narendra Modi leniba nung mapatong balala inyakba metetdaksü.

Minister Yadav-isa Brics linüktemi climate change anema raraba den külemi arem shiruru aser süngdonglidong kümzüksü atema finance aser technology partnerships yanglutsü metetdaksü.

Brics züngsem linüktemji Brazil, Russia, India, China aser South Africa (BRICS) linüktem lir.

### Opposition party tem senden Bengaluru nung July 13 nungi tenzüksü

**New Delhi, Aami/June 29 (Agencies):** Tawa Patna nung opposition party tem telongjem senden amenba sülen maneni Bengaluru yimti nung July 13-14 anogotem nunga senden ayongzükogo, ta Brihostibarnü NCP Tir, Sharad Pawar-i metetdaksü.

Pawar-isa, taoba hopta Bihar yimtiba, Patna nung opposition party tem senden amenba sülen Ato kilonser, Narendra Modi koda mesüi kümogo, ta ashi.

Sangküm Lok Sabha election agitsü lia iba election nung BJP anema tokteptsü atema June 23, 2023 nü opposition party 17 nungi lenirtem senden mena liasü.

Opposition party tem taruba sendenji Congress Tir,

Mallikarjun Kharge leniba nung Shimla nung amentsü ta metetdakja liasü, ajisüaka tang Himachal Pradesh, talisa Shimla nung tzunglu kanga sashia aruba agi Bengaluru nung ang senden amentsü telemtetba agi.

Osangbenertem den jembidang Pawar-i, "Mezüngbuba senden amendang tanabuba sendenji Shimla nung amentsü telemtetba agi liasü, ajisüaka tang Shimla nung tzunglu sashia aruba ajanga taruba sendenji Shimla nung masü saka Bengaluru nung ang July 13-14 anogotem nung amentsü onoki telemtetba agiogo," ta metetdaksü.

"Onok longjema alitsü aser longjemer election nung tokteptsü atema asalentong

yanglutsü. Onokisa tang linük nung lokti tsungda rara aliba aser state aika nung Central sepaitem tim mesüi amshiba anema nokdaksü atema asalentong yanglutsü," ta paisa shisem.

Patna nung Bihar chief minister aser JD(U) lenir, Nitish Kumar-i ayongzükba senden nungji TMC tongti lenir, Mamata Banerjee, DMK lenir MK Stalin, Congress nungi Rahul Gandhi aser Mallikarjun Kharge na aser AAP tongti lenir, Arvind Kejriwal densema party balala nungi lenir 32 dena liasü.

Senden tembangba sülen osangbenertem den jembidang opposition lenirtemi parnoki 2024 küm Lok Sabha election nung longjemer tokteptsü, ta metetdakja liasü.



June 29, 2023 nü Eid anogomong nung South Dinajpur district kübok India-Bangladesh arrtsü checkpoint nung Border Security Force (BSF) aser Border Guard Bangladesh (BGB) sepaitem benjung salem lemsatepa nanglong agütsüba noksa nung angur.

### Myanmar-i India-US külem sangdong aitsür

**New Delhi, June 29 (Agencies):** Myanmar Ministry of Foreign Affairs-i sangdong ka ajanga US Tir, Joe Biden aser India Ato kilonser, Narendra Modi nati külem sangdong ka ajanga Myanmar nung tensa tamajungba akümiba metetdaksüba atema aitsüogo.

Myanmar aser India na arrtsü kilometer 1,600 talang lir. 2021 küm February ita nung Myanmar sepaitemi democracy sorkar atsüngdokba mapang nungi tenzüka iba linük nung civil war lir.

Biden aser Narendra Modi nati külem sangdong ka ajanga, Myanmar nung yimtenren tsütsü tepuokdak alirtem ajak chioktsüla, ken o jembi tenzüksüla aser federal democratic sorkar amenoktsüla, ta metetdakja liasü.

Iba sangdongji aija Myanmar foreign ministry-i sangdong ka ajanga, "Democracy aser

federalism nung ajemdaker sorkar amenoktsü atema meranga inyakba maparen nung Myanmar-i alima linüktem tangatetba, tenungitba aser amalitep nüngdaker, iba denji külemi Myanmar nung tesünep alitsü atema kiralongra tapu ajak aitsür," ta metetdaksü.

Myanmar nung sepai yimsüsüba kübok nisung 150 dak tema nem tasüba temerenshi obendang agütsüogo, ajisüaka Myanmar foreign ministry sangdong ajangabo, parnoki tepuokdak alir 62,818 dang tai tokogo aser nisung 59 nem tasüba temerenshi obendang agüja aliba nungi temerenshi tajemba kümja taküm piyong tepuokdak ang ayutsü, ta metetdaksü.

Biden aser Modi nati külem sangdong agütsüyonga India-ibo tang tashi official süa Myanmar nung sepai yimsüsüba maitsür.

### Bhim Army tongti, Chandrashekar Azad dak kari injang khaloktsü



Chandrashekar Azad

**Saharanpur, June 29 (Agencies):** Bodhbar nikongdang Deoband (Uttar Pradesh) nung Dalit nunger lenir aser Bhim Army tongti, Chandrashekar Azad dak nisung kari injang khaloktsüba sülen Brihostibarnü pai pa pusemertem dang meraratsü mepishi.

Hospital nungi video ka ajanga Azad Samaj Party tongti lenir, Chandrashekar Azad-i, par party-i linük temzüng kübok maneni raratsü, ta ashi.

Hospital yipten nung mejanger Azad-i, "Ajungbena ni amakbaji ni kecha meimlai liasü. Ni ozü medemertem, ni pusemertem aser party nung inyaktertem dang yimjung nung alitsü mepishir. Asenoki linük temzüng kübok maneni raratsü. Nisung crore aika temeim aser temoatsü ajanga ni junga dang lir," ta metetdaksü.

Arrshi küm 36, Azad sentong ka nung adentsü atema Saharanpur district kübok Deoband-i oa liasü. Sentong nung adenba sülen pa gari nung apusoba mapang prangpong amer telok kati pa meyong gari nung injang pezü

khaloktsü. Bodhbar nikongdang 5:00 ako meta Deoband Police station area kübok Union Circle nung pa mena aliba gari nung injang khalokja liasü.

Saharanpur nung Senior Superintendent of Police, Vipin Tada-i, "Police nem iba tatalokba osang metetdaksüba sülen police team ka iba tesem jagi ao. Police team aser pa (Azad) pusemertem pa anasa aliba Community Centre kati anir ao; iba sülen pa district hospital-i anir ao," ta metetdaksü.

Superintendent of Police (City), Abimanyu Manglik-i, pa dak injang khaloktsürtemjia gari ka nung liasü, parnoki ajichilen nungi Azad mena aliba SUV gari nungji injang khaloktsü aser injang pezü nungjagi injang kati pa teboklang nung khashi, ta metetdaksü.

Pa district hospital-i anir aoba sülen mapang tatsüka tsüngda pa pusemertem hospital kima adenshi aser pa nem Z+ security agüjang ta takhangba agütsü.

Tensa meraksatsü atema police-i hospital anasaji police aika lemezükja lir.





## TIR YIMYIM YIMOBILEM (EDITORIAL)

DIMAPUR ROGONÜ, AAMI (JUNE) 30, 2023

### Tanü asüng kaketshibayim

**A**khidang asenok mulungzüng agidang sobaliba otsü, inyakyim aser temzüng ozüng ajak angazüka benschia aru aser züngdangba maparen nunga yong agi dang süka aru. Iba amaji zülu maka aser memetet aliba putu nung temesüng nisung Tsüngrem tenyar Edward Winter Clark o pa kinungtsü Mar Mead nati asenok dang zülutsü aser azüngtsü sayutsü tenzük. Iba anogo nungi tenzuka tanü tashi asenok aliba tesem ajak nung kaketreju lapoka tanur sor küm pezü nungibo kaketrejui yoka zülutsü aser azüngtsü angazükdaktsür. Atangji, kaketreju nung tanurtem dang sayubatemji zülutsü aser azüngtsü metettsü asoshi dangbo masü saka parnok taküm lia aodang nübortem asoshi nungdakba teyari agütsür kaka kuma litettsü len sayur. Aji oda, azüngtsü aser zülutsü metetba aser tangar oshi English aser Hindi ama angazükbaji alu inyaksü atema alulem aser mertsüng yanglua amai lir. Item nung jagi tenzuka kaketrejitem nung alima aser tzüim indang aser anüng nung aliba anü ita petinutem indang bilemdangtsü shisa tenük lapoktsür. Aji oda, kaketreju nung Maths aser Science sayuba nükjidongji pi zülutsüba kaketem nung aliba kisüngji mulungzüng agi koker benschitsüba dang masü saka item nung jagi ajemdaker alima nung nübortem asoshi terenlok mapatem tasen tasen tajungba-tajungba purapiteta inyaka aotsü atema len sayur. Atangji, asenokibo tanüa tangari zülua toktsüba kisüngjia mangazüketter, ashiko aji asenok kolok agi matongba dang masü saka oshi tsütsüa tetsükdaktsü kar alitsüa akok. Iba jagi akok tashi tanga state-tem nungbo Maths, Science, Medical aser Engineering course dena pei tetsü oshi agi sayutsü meranger. Tang nungi ano linük ajunga nung kaketrejitem sayuyim nung temelenshi ka tenzükba ajanga kaketreju nung tanurtem azüng tenzük dang akok tashi pei tetsü oshi agi sayutsü ajungshir aser kodang class ter ajangdir, tang tashi nung agiyonga aruba ama masü saka Arts, Science, Commerce ta kecha mal, pei jangraba subject agitsü lenmang sadema lapoktsür. Ibayongji, tangbo Arts azüngertema Maths agitsü akoker. Ibaji dang masü saka class 12 ajangerbo kechisüdir süaka küm asem pezü endoka graduate asütsüla ta masü. Ajisüaka, class 12 sülen College azüng tenzük mezüng mesüra tanabuba küm takok ngur mezüngi anennüra certificate mesüra diploma agütsütsü aser ibaji degree ngua azüngba den kasasa amai asütsü, anungji tang nungibo college nung mezüng küm ajangtetterbo züngtor anenba (dropout) otsü mali akümtsü. Iba ama kaketrejitem nung azüngba aser sayuyim melenshiba nükjidong ya kaketshirtem ajak züngzüker külen tagidak maka mekümi alima nung nübortem nungdakba mapa kabosa yateta inyaka lidaktsütsü asoshi latettsüba mapa ka lir. Aji oda, joko University Grants Commission-ia tanü putu nung University nung azüngertem ya University campus aser class takdang nung dang kaketshisatsü bushia memongi Industry tapu balala nung oa mapa inyak angazükba sentonga agia aotsü atema Univeristy-tem o Industry-tem na tesendaktep alitsüla ta metetdaktsüogo. Iba sayuyim aser angazükym ya tanü putu nung tazüngertem ajak mapa inyaker kümdaktsütsü asoshi tenzükba sentong tasen aser tajung ka asütsü. Atangji, tazüngba ya mapa inyaksü azünger, anungji tazüngdang mapa inyakdak oagi mapa inyak angazüktsüla. Ajisüaka, yashi tashi asenok kaketrejitem nung sayuba yabo mapa inyaksü sayur masü saka mapa inyakertem asoshi ozüng yanglutsü, mapa inyakertem azüoktsü, mapa inyakertem nem permit yanglutsütsü aser mapa inyakertem dang nungi alimelen sarua agitsü züngdaktsür amai sayur. Iba jagi züngzükli mapai aoer masü, mapa mangu bushia amonger. Joko, yasüng o tanep na tsüngda alima putua balala amato melenshia ogo. Aji oda, nisungi inyakba mapatem ajak ka khen, ka khen ta machine-i melena inyakyonga aoba asenoki angur. Joko, asenoki metetnüba, asen teblemtsü aser asen nungdak ajak machine dang - dang asüngdang. Aji oda, machine-ang asenok tsüngrem, asenok tesayur aser asenok apuani ama kümadokogo. Iba ama putu ka nung tazüngertem machine yanglu meshira aser machine inyakyimtem memetetra, atangji, züngteter machine amshia mapa inyaksü melen, mapa inyak mashi nungji, machine lar kümadoktsü.

## OLEMSABANG

### TEMELENSHI ADOKDAKTSÜBA LENISÜBA: MOSA TAKÜM ASER LENISÜBA NUNGI TANGAZÜKTSÜ KAR

~ Temsüyanger, CTC (source:- Mitkar)

#### (Yashi adok nungi)

Saka nüburtem shirnok pai kümzüktsü merang parnoki pa kuli magizük, anungji pa nisung tepseter ta anemtsü tenzük, aser parnoki pa kümzüktsü memulung. Farao chubai Mosa jendok, anungji pa shiba aser kechi pa taküm jenjang khenyongi samadok. Mosa kisüng kümadok nung media limai jena aotsüsa aküm. Kodang pa media lima atong, sannüker tetsür tenet kari sensamatsüba nungi pai kümzük. Tetsürtem asoshi pai temeden jembitsü, pai parnok yari, aser parnok asoshi pai nokdak. Anungji parnok santem asoshi tzübu nungi tzü angu. Item tetsürtemi tebu Ruel dangi arua iba tatalokba indang ashi (Ani. 2:17-19). Iba tatalokba nung ano maneni Mosa taküm nung aketba yimya ka angur; tangar asoshi aser tangar yaritsü asoshi tangatetba tajung Mosa dak liasü. Talisa shirnok timtem toushi nung liasü, shirnok sobaliba ajanga amokbanger tashi maitba jenjang tia nung liasü, item nüburtem telok yaritsü aser pa teka ajanga yaritsü tangatetba tajung pa taküm yimya nung angur.

Tanabuba Mosa taküm tekatet nung pa kibong aküm. Kibong kümer külen tebu tajung ka aküm. Küm süiyonga aodang pa taküm sannüker ka aküm. Yamaji Tsüngremer sentong tarutsü asoshi kechi pai memeteti liasü.

Tasembuba Mosa taküm tekatet nung, santem nüka alidang Tsüngremi pa aja (Ani. 3:7-12). Iba tajaba nung Mosa lenisüba mapa aser Tsüngremer tenyaba mapa tenzük.

Ano Kibubai ashi, "Ni atangji kü nüburtem ljip lima nung ala- ashiba nguogo; parnok tanükertem timtem agütsüba nungi kümzüktsü ajepba ola ni angashiogo. Parnok otia ajak ni meteta kar. Ljip nunger ket nungi parnok kümzüktsü, aser iba lima nungjagi aniteta alinük tajung aser tesadem ka mamatzü aser ninang mojitzü yima aliba lima; kong Kanan nunger, Het nunger, Amor nunger, Periz nunger, Hiv nunger, aser Yibus nunger lir, ajagi parnok anir aotsü ni alu. Tang Israel purtemi nunga ajepba ola ni angashiogo, aser ljip nungeri parnok rishikangshiba ni nguogo. Anungji tang arung, kü nübur ljip lima nungi anitettsü asoshi ni na Farao dangi yokdi. Saka Mosai Tsüngrem dang ashi, "Farao dangi orr ljip nungi Israel chirtem anitettsüsa ni shiba?" (Ani. 3:7-12).

Tsüngremi pa nem mapa ka agütsü aser aji pa nüburtem ljip lima nung alar tia nungi anitettsü asoshi khuret agütsü (Ani. 3:16-17). Tsüngrem den ajurutebpa ajanga pa mabensabatem Tsüngremi jungkai adokdaktsü, aser pa mabensaba taküm ka ta pai meteta aru. Tsüngremi kodang pa nem ozüng agütsü, Mosai Tsüngrem dang tasüngdangba karaa asüngdang. Mosa asoshi kechisa timtem pai ashitsü asoshi Tsüngremi pa nem lenmang lapoktsü. Mosa shiba? (Ani. 3:11); Pa taküm nung aser lokti nung jembishinü majungba (Ani. 4:10); Nüburtemi pa dak mamangtsüba (Ani. 4:1); Pa masü tangar ka yoktsü asoshi asüngdangba (Ani. 4:13), item tasüngdangbatem angutsü. Ibai Laishiba nung Tsüngrem den sensaksem talangtiba angutsü. Ibai Tsüngrem aser Mosa tsüngda kanga dang ototia jembitebpa sensaksem ka lir. Tsüngremi Pa shiba Mosa dang ashi (Ani.3:14). Mosai pa temulung raksaba rakpoka sayutsü asoshi Tsüngremi temelaba pa nem agutsü (Ani. 4:14).

Yamaji süaka ni na dang shimtetogo ta Tsüngremi kodanga Mosa dang melanzü. Tsüngremi Pa shiba Mosa dang ashi, "Niji shiba aji Ni", iba jagi Mosa nem tashi agütsü, Mosa taküm shiba iba jagi jangjatsü, anungji Tsüngrem leniba Mosa den liasü. Tsüngremi Mosa jembiba nung yaritsü aser kechi jembitsü Pai sayu (Ani. 4:12). Yamaji Tsüngremer tashi aser taküm ajanga Tsüngremer lenisüba wadang Mosa nem nongloktsü aser ibaji ajangzüktsü asoshi Mosai apuso. Ibai meimchir ka dang asünung kangasa wadang tulu aser mapa tasak liasü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



## DBC nung mezüing D.Min & M.Div degree agütsü



Discipleship Bible College, Dimapur nung mezüing D.Min aser M.Div renemertem den tongti o jembir Rev. Dr. Wati Longchar aser DBC nung tesayur aser ketdangsertem noksa nung angur ( Dimapur, June 29, 2023).

**Dimapur, June 29 (TYO) :** Discipleship Bible College (DBC) nung tanü Doctor of Ministry renemer nisung 6 aser Master of Divinity renemer nisung ana nem degree agütsüba sentong tajung ka ayongzüka liogo.

Item laishirtem azüingba sentong ya Programme for Theology and Cultures in Asia aser DBC na longjemer inyakba sentong ka liasü. M.Div yabo Distance Education sentong ka lir.

Tanü iba sentong nung tongti o jembir, Rev.Dr.Wati Longchar liasü. Pa ya DBC nung Doctor of Ministry azüingba maparen nung Consultant aser ano FTESEA, USA nunga Executive Director lir.

Tanü DBC nung D.Min renemer par trok aser M.Div renemer parnok ana nem pei azüingba nung takok anguba yari Doctorate aser Master degree agütsüba mapang Rev.Dr.Wati Longchar den Dean of D.Min Studies

Dr.Imsenperong aser Dean of M.Div. Distance Education Dr.Takayaba nungertemi shilem agia liasü.

Iba sentong nung DBC Board of Governors nung mendenbuba Dr.T.Lima Jamiri tepela o jembir aser Associate Prof.Dr.Alem Sangtami lai azüing. Iba sentong tenzüka DBC Academic Dean Dr. Husazulu Chuzho-i sarasadem aser laishirtem rongnung teburtemi ken tajung ka tenloksü.

## Vietnam nung sorkar ketdangsertem tepsetba sülen Khristantem tsübur

**June 29, 2023:** Tawa Vietnam nung sorkar ketdangsertem den police kar tepsetba sülen linük nung lisopur Khristantem sorkari parnok nem tai tongloksütsüa akok, ta bilema tsübur.

June 11, 2023 anepdang züingba prangpong amer teloktemi police pezü den sorkar ketdangser ana aser civilian asem khaseta liasü.

Vietnam nung Dak Lak Province kübok Kuin District nung prangpong amer telok jagi prangpong den grenades aser petrol bomb amshia amak.

Iba tatalokba atema lisopur minority tribals 'Montagnards' dak melung malemer.

Vietnam nung Evangelical Khristan million 2 dak tema lir, aser tawa police den ketdangsertem tepsetba atema Montagnard Khristantem dak melung malener.

Iba dak alia tribal Arogo kari yimtenren tsütsü sorkar dang melung masüba ola adoka aruba agi iba tatalokba asoshi Khristantem dak melung malemer.

Facebook video ka prokshio, aser iba video apibo police aser sorkar ketdangsertem amakba nungji Montagnard Khristanten lanurtemia shilem agia lir amai sayur, kechiyong video nungji anünglen helicopter nungi mesüra drone photography amshia tangokba Evangelical Church of Vietnam South (ECVN-S) Tenla ki aser Christian Mission Church (CMC) Tenla ki-a sayur.

Sorkar anema apusoba atema temerenshi tulu lir, ibayongji kanga tekübok jenjang nung aliba Montagnard Khristantem kanga tsübuteper. Tesüiba küm ishika tsüingda

Vietnam nung Khristantem reshikangshiba ajema kümogo, ajisüaka tawa tatalokba ajanga Khristantem reshikangshi bulua akümtsüa akok.

June 11 nü tatalokba sülen tensa raksaogo aser sorkari linük tesem aika mokdangogo aser iba tatalokba dak sendakba nung June 20 tashi nung nisung 70 dak tema pua lir.

December 2022 U.S. State Department indang Special Watch List nung Vietnam linük züingsemogo; tamangba yimsü temeden anema inyakba ajanga Vietnam-a SWL nung züingok.

Vietnam linük nung Khristantem reshikangshi kanga ajema kümogo, ajisüaka alima nung Khristantem alitsü linük tamajungtiba 50 rongnung Vietnam ya jenjang 25buba nung lir (Open Doors' World Watch List).

## ANOGO ABEN TSÜNGREM DEN

### Kümdanga Proktsüla

T.Ken 109:14-20

Nai kechi meimer iba jagi na koda alitsü lemtetdaksür. Kechi agi asenok peladaksür iba jagi asenok anir. Dawidi pa tsükchir indang zülu, "Pai atakatem meimba ama aji pa dangi arudakjang, pai temoatsü nung pelaba nung aji pa nungi talangka piladakjang."

Nai kechi meimer ? Nai kechi janrar ? Nai kechi prok kasaji nai arutsü. Tsükchirtemi atakatem proka liasü aser parnok dangi tejashi arutsü ta Dawidi metetta liasü. Parnok Tsüngrem temoatsü nungi pila liasü aser parnoki tepela aser taküm nükjitung samadar ta Dawidi metetta liasü.

Asenoki asen telunglen aser tejangraba proker kümdi. Aseni kechi meimer aseni angutsü akok saka aji ngur külen asenoki jashitsü akok. Temenen prokba nung tepela alitsü akok saka iba aruba nung tepela mali. Khristantem nükztü aser meranga inyakbaji teperokba nung lir, asenok tepela aruba nung ji alitsü. Saka shirnoki shi aser alima pelaba asoshi alir parnok prokba nung pelateper aser aluruba nung tejashi angur. Taküm nung nai aginüba agira nai ibaji asoshi aatsüla.

Tanelaren tejangraba proktsü koda tongtipang- Tsüngrem o asoshi, sarasademtsü, nübur den alitsü asoshi aser külemtsü janraba aser Tsüngrem tenzüksü tejangraba nung liang.

Koba agi tanelaren indaksür ibaji ne telung taküm nung prokang. Tsüngrem O agi mesüba aser Kibuba den jajaba ajanga azüokang. Ne tejangraba Pai amshia ne taküm nung aser tangar taküm nung Pai moatsütsü.

## China nung Khristan yimsü anema Smart Religion app tenzükogo



**June 29, 2023:** China kübok Henan province nung Khristantem tekülem sentong nung adenba nokdangtsü nükjidong nung China Communist Party (CCP)-i tekülem sentong nung adentsü atema online ajanga application agütsütsü asoshi tuyuogo.

Henan provincial religious department-i adokba 'Smart Religion' app ya ozüing alema lir; iba app adokba sülen Tenla kidangi aoertem ajema kümogo, ta tawa Khristan melungtet telok China Aid-i metetdaksü.

Tamangertemi Tenla kitem, mosques mesüra Buddhist tekülem kitemi onüra parnoki "Smart Religion," ta ajaba app ajanga application agüja online reservations asütsüla.

Tamalen osangbener den

International Religious Freedom Summit Co-Chair, Sam Brownback-i, "Joko tangbo parnok (China Communist Party) nisungtem Tenla kidangi aotsü atema-a phone ajanga online register asütsü tuyur. Ibaji parnok tamangertem oli-ora ajak itdangitsü aser tekülem kitem shibangtsütsü nükjidong nung lir," ta metetdaksü.

Online ajanga yimsü dak sendakba osangtsüsang prokba Chinese organization mesüra nija ajaki provincial religious affairs departments nem application agütsütsüla aser online ajanga tekülem sentong ayongzüka aginer Arogo, tanga teloktem aser colleges-i jelia Internet Religious Information Service Permit meshitsüla.



Mokokchung, Aami/June 29(TYO) : Longkhum Baptist Arogo nung Christian Education Ministry nung June 28 nungi 30b tashi tila tanurtem tanela asüngsashiba sentong ka "2023 Get Together" ta nungja agutsür "Khrista jilu Ajizükertem. Efesa 5:1" omen nung ajemdaker kadagi aser iba sentong nung tila tanur 133 kanga dang temoatsü ngua agiba noksa angur.



**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Remten**

(v) tebang mechushia chiyongsü achiba (keep masticating)

\* Chi chiyonger **remtenba** yimya ya kanga majung.

**Remdong**

(n) nashi aser sü sentaka ayuba Y süng (Y shaped post to tie cows and mithuns)

\* Takar kima **remdong** nung nashi aser sü sentaka ayur.

**OLONG PAITEP # 6561**

1		2		3		4	5			
				6						7
		8								
9				10		11				
			12						13	
						14				
16							17			

**TIPIEN**

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S \_\_\_ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

**LANGTSÜNGLEN**

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

**OLONG PAITEP # 6560 TELANGZÜBA**

**TIPIEN :**

- 2. Bangsemo, 6. Tiptem, 8. Jen,
- 9. Talila, 11. Aren, 12. Tzübo,
- 14. Alia, 16. Angati, 17. Odi,
- 18. Azü, 19. Sünglang.

**LANGTSÜNGLEN :**

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong,
- 13. Ajizük, 14. Aitsü, 15. Tasa,
- 16. Aina.



**KIBONG TASEN KA YIMYA :**



**Kibong kümer**

**mezüng küm** : Kinungbui jembitsü, kinungtsüi angatsü.

**Tanabuba küm** : Kinungtsüi jembitsü, Kinungbui angatsü.

**Tasembuba küm** : Tenapronglaji jembitsü, kiyongeri angatsü.

- Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

**Rahul Gandhi anogo ana atema Manipur tongogo**



Rahul Gandhi Imphal airport tonga arudang tangokba noksa nung angur.

**Imphal, Aami/June 29 (Agencies):** Congress lenir tejen Rahul Gandhi Brehostibarnü (June 29) anogo ana atema mepetmesü nung aliba Manipur state tongogo.

Rahul Gandhi ya Congress lenir tejen aser taoba Manipur chief minister Okram Ibobi Singh aser Manipur Congress tekolakba K Meghachandra Singh nati Imphal airport nung agisüka liasü.

Kasa anogo Congress party sangdong ka ajanga ashiba agi, Rahul Gandhi Bishnupur district-i meyoki state police-i sota ayu.

"Modi-i aniba sorkari Rahul Gandhi Imphal adener relief camp tem semdanga nüburtem sen sensak asemtsü atema nokdangba ya tesasatsüka," ta Congress lenir tejen Jairam Ramesh-i ashi.

"Pai anogo ana atema Manipur semdangba ya Bharat Jodo Yatra nung shilem ka ama lir. Ato Kilonser-i ola madoki mesüra inyaksangshi kecha masütsü atema shimtsü akok

ajisüaka kechiba Manipur nung kin balala den sensaksema tesunep agütsütsü asoshi Rahul Gandhi-i merangdangba nokdangba," ta Ramwah-i ashi.

Bishnupur mesemdangdaksüi nokdangba sülen Rahul Gandhi Imphal-i meyipa oa liasü.

Kasa mapang nung Manipur dak sendakba nung Ato Kilonser-i ola madokba atema Northeast Students' Organisation (NESO)-i ashishiogo.

"Linük Ato Kilonser, shibai linük kübok tanga state tem nung ken o balala adokba mapang kanga kara telangzüba agütsür, pai Manipur nung mepetmesü tenezüker ita ana jungnüaka kecha ola matokba ya taoksatsüka lir," ta NESO mendenbuba Samuel Jyrwa-i ashi.

"Onoki PM dang iba ken o dak sendakba nung ola atoktsü aser iba azütokshi lendong anendaksütsü atema jenjang tapet agitsü aser mangatettep aliba tembangdaksütsü

mepeshir," ta paisa ashi.

NESO-isa, Manipur nung yimjung atema inyaksangshitsü asoshi ayongzükgogo.

"Northeast state ajak indang lokti tentet ka ama Manipur nung yimjung benoktsü atema mapang tongja tongogo," ta NESO mendenbubai ashi.

NESO kübok kaketshir lokti tentetemi Manipur nung yimjung atema Bodhbar aonung Northeast state yimtiba tenetprongla nung temo milen tsükdaka sentong ayongzüka agiogo.

Northeast Students' Organisation (NESO) nung Northeast states tenet nungi kaketshir lokti tentet ti lir.

NESO züngsemtem rongnung All Assam Students' Union (AASU), Khasi Students' Union (KSU), Garo Students' Union (GSU), All Arunachal Pradesh Students' Union (AAPSU), Naga Students' Federation (NSF), All Manipur Students' Union (AMSU) Mizo Zirlai Pawl (MZP) aser Twipra Students' Federation (TSF) densema lir.

**Tripura Rath Yatra nung asürtem nem PM Modi-i teyari agütsütsü**

**Agartala, Aami/June 29 (Agencies):** Tripura kübok Unakoti district nung Rath Yatra ka ayongzüka agiba mapang mi lendong nung asür kinungertem nem sen lakh anana agütsütsü ta Ato Kilonser Narendra Modi-i sangdongogo.

Kasa mapang nung iba mi lendong nung yirur alirtem nem sen 50,000 agütsütsü ta sangdongogo.

Rath Yatra amungba mapang kor gari (chariot) ka nung mi adokba sülen arishi küm trok tanung ka densema nisung tenet asü.

Kasa lendong nungsa tanur ana densema nisung 16 yirua liasü.

"Asür kinungertem nem PMNRF nungi teyari sen lakh 2 aser yirur alirtem nem 50,000 agütsütsü," ta PM Modi-i ashi.

Paisa, iba tia maka lendong nung asürtem den asükhü lemsatepogo.

Rath Yatra sentong agiba mapang kor gari kati high-tension wire nung kongshiba sülen iba lendong ataloka liasü.

Tripura chief minister Manik Saha-ia, iba lendong nung asür kinungertem den asükhü lemsatepogo.

Tripura CM Manik Saha-i, "iba ya tia maka lendong tulu ka lir. Devotees aika taküm samaogo aser Ulta Rath Yatra nung light agi apuba sülen nisung

aika yirur lir," ta ashi.

"Iba lendong nung asür kinungertem den asükhü lemsateper. Mangyim jashi mapang item kibongtem den state sorkar nokdaka lir," ta pai shisem.

Maneni TIPRA mendenbuba Pradyot Debbarma-i asür kinungertem den asükhü lemsatepogo.

"Kumarghat nung Rath Yatra mapa lendong atalokba osang angazüka iba lendong nung asürtem den asükhü lemsateper. Ni local MLA aser MDC tem dang takokba tashi teyari agütsütsü shiogo," ta TIPRA mendenbuba Pradyot Debbarma-i ashi.

**Assam nung CM nem Gamosa aser naro sempet magütsütsü tuyu**

**Guwahati, Aami/June 29 (Agencies):** Assam chief minister tem nem official sentong balala agiba mapang Gamosa aser naro sempet magütsütsü.

Iba tetuyuba ya Assam chief minister's office (CMO)-i Bodhbarnü (June 28) state kübok district deputy commissioner ajak nem agüja liasü.

"HCM nem Gamosa/naro

asertanga sempet khenyongi magütsütsüla," ta CMO tetuyuba nung shia lir.

Maneni CMO-isa, DC tem dang official sentong agiba mapang Assam chief minister nem ali agi yangluba marok nung dang songu agütsütsü tetuyuba agütsüogo.

Ano tzu-a khen dang amshiba plastic bottle tem nung masü saka glass bottles/jug tem


nung toktsütsü atema DC tem nem tetuyuba agütsüogo.

Kasa mapang nung tetuyuba nungsa, Assam chief minister official sentong mapang chiyongtsü ajak vegetarian asütsüla ta shiogo.

DC tem dangsa, HCM anonung yipzükra tasüngnep commercial sentong ka atemtsü atema achaayangtsü asoshi tetuyuba agütsüogo.



# Wagner teloki sorkar anema nokdakba mechi General Sergei Surovikin pua lir



General Sergei Surovikin

**Moscow, Aami/June 29 (Agencies):** Wagner mercenary forces temi linük yimsüsür anema nokdakba sülen mitkar ketdangsürtem mapa nungi anentsüba osangtem angashiba mapang Russia ketdangsüri Ukraine nung Russia indang military operations indang deputy commander General Sergei Surovikin pua lir, ta Moscow Times osangkaket aser Russian military blogger kati ashi.

Dangar dang temeim mesayuba mechi Russian media ajanga "General Armageddon" ta tenüng agüja alisang Surovikin ya Russia-i Chechnya aser Syria nung raraba nung nübu tejen ka lir aser Russia Tir Vladimir Putin-i tushia arua liasü.

Russia indang Defence Ministry inyaksangshi meteta aliba sources anati Russia nung oshi nung adokba The Moscow Times dang ashiba agi, linük yimsüsür anema nokdakba mapang Wagner tekolakba Yevgeny Prigozhin den adenba ajanga Surovikin ya apu ta osang ka ajanga ashi.

Russian military blogger Vladimir Romanov-ia Surovikin apuba indang osang Bodhbarnü sangdonga liasü, ta Moscow Times ajanga ashi, aser Washington, DC nung amenoka

aliba Institute for the Study of War (ISW) ajanga sangdong ka nung, Surovikin den sendaktepa aliba mitkar temi yimsüsür anema nokdakba tensa tali tepenjaba kumdaktsü ta tai tonglokja lir ta Russian sources kati ashir, ta shia liasü.

Russia indang Defence Ministry ajanga Surovikin apuba osang nung telangzüba agüja mali, ta osangkaket ajanga ashi.

Wagner sepaitemi Moscow-i aita linük nung mitkar lenirtem aputsü merangba sülen Russian military command nung ketdangsür aika mapa nungi anentsüba mapang lir ta Russian military blogging site tejangja kati ashi, ta ISW ajanga Bodhbarnü ashi.

Wagner teloki Russia ketdangsür anema nokdakba Surovikin-i bukuma liasü ta United States ketdangsür aseme Bodhbarnü ashi saka pai parnok yariba tejangba memetet.

Prigozhin-i linük lenirtem anema nok-nü amer nokdaktsü sentong yangluba ya Surovikin-i jelia yongi meteter liasü aser Russian ketdangsür temi pa dena ali mali repranger, ta New York Times-ia ashi.

Wagner sepaitem ya Moscow atongtsü kilometre 200 lia parnok longkak aitba anena liasü.

Iba tatalokba atema kuli tejangja makai asadanga jenti alitsü aser Times osangkaket nung adoktsüba ya tatishitsü ka lir. Saka Russian army aser nüburttem ajak Tir Vladimir Putin den nokdaka liasü, ta Kremlin odongtar Dmitry Peskov-i Bodhbarnü ashi.

Belarus Tir Alexander Lukashenko-i Wagner tekolakba Prigozhin ya par linük tongogo, ta Mongulbarnü shia liasü, koba pai tetsüngtai ia jembishinü akaba ajanga Wagner sepaitem Moscow-i aotsü aliba anen.

Wagner sepaitem nem mitkari mamshi yutsüba tesem ka agüja lir, kong parnoki süki yanglua ano kechi inyaktüsü ta bilemstsü, ta Lukashenko-i ashi.

Wagner sepaitemi par linük yimsüsür anema nokdakba nung tamakok ajuruba ajanga Putin tashi maitba kumogo saka Ukraine nungi sepaitem anizüker aotsü indangbo mejangja, ta Bodhbarnü Germany indang Chancellor Olaf Scholz-i ashi.

"Pa tashi maitba kumogo ta ni amanger, kechiaser iba yagi 'autocratic power structure' nung tapok adokba sayur aser pai bilemba ama tashi kangabo mali, ta Scholz-i ashi.

Putin kobika tir mapa inyaktüsü ta asadanga nung shilem maginer, aser West-i Ukraine yariba ya par sasa par kumzüka alitsü merangba nung yariba dang ashi Russia yimsüsür melentsü atema masü, ta Scholz-i ashi.

"Wagner sepaitem ya military unit ka dang lir aser parnoki alima tesem ajunga nung kanga sashia rarar aser Russia-i Ukraine den raraba nunga kanga sashia nokdak," ta paisa ashi.

## Settsü Baptist Arogo Women Ministry, Settsüsür Telongjem



Anogo : 4th July, 2023  
Mapang : 7:00 AM - 3:00 PM  
Tesem : Settsü Junction

**Item ya angutsü :**  
Aonsotsü, Pongsen, Chitem (Settsü Special), Handicraft, Fun Fair etc.

## RSF temi pua aliba Sudan sepai 125 chiokogo: Red Cross

**Khartoum, Aami/June 29 (Agencies):** Sudan nung rara adoka aliba telok ana tetsüngtai ia jembishinü akaba ajanga rara mapang apuba mitkar (prisoners of war) 100 dak tema chiokogo, ta International Committee of the Red Cross (ICRC) ajanga ashir.

Sudanese army tekolakba aser paramilitary Rapid Support Forces (RSF) tsüngta tashi agi raktepa April 15 nü nungi tenzüka rarayonga arudang nisung meyrirang aika takum samaogo aser ano million aika pei ki yutsür tesem balala nung jenoka lir.

RSF temi pua aliba army 125 tashi Eid al-Adha matongdang chioka pei kibong dangi meyipa otetogo, ta ICRC ajanga Brehostibarnü ashi. Islamic calendar nung Eid al-Adha ya tongtipang benjong ka lir. Item sepaitem rongnung nisung 44 yirur liasü, ta iba lokti tentet ajanga ashi.

Parnok ya linük yimtiba Khartoum nungi south tsütsü wad Madani-i anir ao.

ICRC teyari nung linük anüolen kanga sashia raraba Darfur region nungi yirur alir nisung 14 Hombarnü chioka liasü.

"Iba mera tajung agitetba ajanga kinungertem külemi Eid

al-Adah külemi munga alitsü. Rara nung anatsülen nungi pua alirtem chioktsü asoshi tetsüngtai aitsü renema lir," ta Sudan nung ICRC indang head of delegation, Jean Christophe Sandoz-i ashi.

Rara adoka alidak ICRC ya shinga dena madener aser timtem ajurua alirtem anepalutsü nükjidong nung inyaker.

Parnoki rara nung anatsülen tepuokdak alirtem semdang aser parnok kinungertem den osang agitepba nung yarir. Rara nung aliba telok temi mepishiba nung ajemdaker parnoki tepuokdak alirtem chioktsü mesüra melenteptsü maparen ayongzüka inyaker.

Tan hopta Sudan indang army aser RSF ajanga Eid al-Adha atema shinga dena mejembitepi pai sasa ceasefire sangdonga liasü, saka Khartoum nung alirtemi iba sangdong ya tetetzü mali, kechiaser injang-bomb khaloktsüba, tayimtsü amshia amakba aser tayimtsü dak injang-bomb khaloktsüba manener, ta ashir.

Saudi Arabia aser United States densema linük balalai tetsüngtai ia ceasefire tezüngzüktep yanglu saka züngzüktepba ama meinyaker.

## Taliban-i sorkar atsüngba sülen civilian 1,000 dak tema süogo: UN



**New York, Aami/June 29 (Agencies):** United Nations-i ashiba agi, Afghanistan nung Taliban-i sorkar atsüngba sülen civilian tem aika asüba aser yirurtem kanga agi tajemba kumogo.

Mongolbarnü sangdongba report ka ajanga UN's mission to Afghanistan (UNAMA)-i ashiba agi, 2021 kum August ita nungi taküm kum May ita tashi nung civilian 1,095 tepsetogo aser civilian 2,679 yirurogo.

Asürtem ya timba, mosques, kaket riju balala aser shishilembadak pei temang nung bomb alenoker pokdaktsürtem densema improvised explosive devices temi tepsetba lir.

NATO-i teyari agütsüba military chirepba Taliban-i inyakyim achaayang tenzüka sülen telungpurtem kanga ajema kumogo, ajisüaka security tsütsü maneni tetsükdaktsü adoker aser talisa ISIL (ISIS) puri timtem agütsüdar, ta UN sangdong ajangsa metetdaktsü.

UNAMA-i ashiba agi, tesem balala ya Taliban puri

timba maka liasü. Osang ajangsa, mepetmesü lendong balala atalokba tajemba kumaka tawa lendong tesashiba ataloka arudar, ta ashi

"UNAMA indang osang ajanga tesem balala amakba ajanga civilian tem dak kongshiba indang dang metetdaktsür masü saka 2021 kum August 15 nü sülen tesem balala amakba koda tesashiba aküm iba indang metetdaktsü, kechiyong nüburttem amakbabo tajemba kumogo saka tesashiba kumogo," ta report nung shia lir.

Asürtem aser yirurtem 1,700 dak tema ISIL puri bomb amshia amakba mapang atalokba lir, koba parnoki nangzüokogo, ta UNAMA-i ashi.

Taliban-i ashiba agi, linük kumzüka ayutsü atema parnok rangloker inyakdar aser ita ishika tsüngda ISIL tesseptem aika meitaogo.

UN report dak sendakba nung telangzüba agütsüba mapang Taliban indang foreign ministry-i ashiba agi, Taliban-i

Islamic Emirate of Afghanistan ta nungja agütsür sorkar mekümtet tsüngda kum aika raraba mapang Afghanistan nung security tsütsü tetsükdaktsü tulu adoka aruogo ajisüaka tangbo tensa tajungba kumogo.

"Islamic Emirate Security force temi lisopurtem tekümzüka kübok toktsütsü atema inyaksangshiba den kiralongrartem raktoktsü aser parnok nem tejenokdak magütsütsü asoshi mapang shidak nung jenjang tapet agia arudar," ta ministry-i ashi.

UN report ajangasa, linük ajunga nung rongsenketzung kanga mejungi kümer nüburttem kangshitepba mapang ka nung ano security tsütsü tetsükdaktsü adokdakja tesem balala maka arudar.

Taliban-i sorkar atsüngba sülen linük nung senotsü teyari agüja aliba kanga tajemba kumogo aser ibayongji tang Taliban-i aniba sorkar kübok Afghan nungertem medical,

senotsü aser tekelok shisatsü nung teyari mongutet-i arudar, ta report ajangsa metetdaktsüogo.

2021 nung sorkar kümtetba mapang takok tashi ajak liromedema yimsü asütsü ta tenangzüka agüjaka Taliban-i linük amokbangba sülen temzung ozüng tesashi benoker inyaksangshia arudar.

Parnok yimsüsüba kübok tetsürtem grade trokbuba sülen kaket shisatsü angazüktsü memelar aser Afghan tsürtem n o n - g o v e r n e n t a l organisations aser UN densema mapa timba ka nung inyatsü memelar aser lokti libaren balala nung shilem magitsü atema tenokdanga agütsüogo.

Item jenjangtem agiba ya 1990s nung Taliba-i Afghanistan yimsü asüba mapang ozüng tesashi benoka yimsü asüba den kasa dang lir.

Taliban yimsüsüba ya UN aser alima kintemi tang tashi nung officially agizüka mali.



## Women Football League: Hilly Girls aser KISCE nati takok angu



**Kohima, Aami/June 29 (TYO):** Tang asaya aliba Ibuba Nagaland Open Women Football League cum Knock-out asayamung nung Brehostibarnü Hilly Girls Football aser Khelo India State Centre of Excellence (KISCE) Kohima nati pei tata asaya kokogo.

Iba asayamung ya Youth Resources and Sports Department-i ayongzüka IG Stadium, Kohima nung asayadaki.

Tanü mezügbuba asaya Hilly Girls-i goal 3-1 agi Northern Angami Youth &

Sports Association (NAYSA)-C kokogo.

Asaya nung Hilly Girls atema mezügbuba goal ana Thenozolu-i idaktsü aser Kekhriekuonuo-i tasembuba goalidakja liasü. NAYSA-C atema goal ka ya Luolakhonuo-i idaktsü.

Tanabuba asaya nung KISCE Kohima-i goal 5-0 agi Peren District Women Football Club (PDW FC) kokogo.

Asaya nung Khrotsou-i mezügbuba goal idaktsü aser iba sülen Neke-i goal ana

idaktsü. Maneni Diezchinuo aser Mhasekhonuo natia goal kaka idakja liasü. Tang tashi nung KICSE Kohima pur asaya ka nunga danga tamakok ngua mali aser parnoki point 16 nguteta temaba jenjang nung lir. Tanabuba jenjang nung FAPD aser Hilly Girls na lir aser team anaprongla point pezüzü nguteta lir.

### June 30 nü asaya:

1. PWD FC vs Hilly Girls @ 3PM
2. NATSA-C vs FAPD FC @ 4:15 PM.

## Mkg. nung 35 buba Mokochung Badminton Open Championship 2023 tenzükogo



Mokochung nung 35 buba Mokochung Badminton Open Championship 2023 Wb.Jamonger Ao-i tenzüksüdag tangokba noksa.

**Mokochung, Aami/June 29 (TYO):** Indoor Badminton Stadium, Mokochung nung tanü Mokochung District Badminton Association (MDBA)-i ayongzüka 35 buba Mokochung Badminton Open Championship 2023 tenzükogo.

Tanü iba asayamung sentong ya Wb. Jamonger Ao Assistant Director, Food & Civil Supplies, Mokochung tetushi tesemdanger ka süa

tenzüksür kelen pai Mokochung nung Badminton asaya ajungketsü talisa lanurtem anitetsü asoshi MDBA lenirtemi iba sentong ayongzüka asoshi tenungsang aguja ashi.

Asayar tem chichiba asayar jenjang nung ajungketa temaba national aser international jenjang nung asayatetsüsa anitetsü kangasa nungtaker ta Jamonger-isa ajungmesoa ashi.

Tanü iba kasa sentong nung MDBA Tir Martoshi ajanga iba tetoktepba nung tajungtibatem shimteter District Badminton Championship Kohima nung akadang Mokochung district tenü nung asayadaktsüsüta metetdaktsü.


Iba tetoktepba nung tetsür tebur telemsa balala nung asayar ajak agi 76-i shilem agidagi aser iba asayamung sentong July 1 nü tembangtsü.

## Caroline Wozniacki ano tanaben asaya tenzüksü

**New Delhi, Aami/June 29 (Agencies):** Taoba world number one asayar Caroline Wozniacki-i, Brehostibarnü sangdong ka ajanga la ano maneni tennis asayatsü asoshi telemtetba agiba sangdongogo.

2020 küm professional tennis asaya nung anentsü atema telemtetba agiba sangdongba sülen tang lai iba osang metetdaktsüogo.

"Taoba küm asem tashi tennis asaya nungi pilar aliba mapang ozü kibong den mapang tajung aika intokogo; ni tanur ana tetsü kümogo aser iba atema kanga pelar. Ajisüaka ni nükjidong kar lir aser aji



Caroline Wozniacki

ajanzükner," ta Wozniacki-i la indang Instagram profile nung zülutsü. "Ni meyipa arua asayatsü atema matateter," ta lai ashi.

Taoba mapang asayaba mapang Wozniacki-i kanga junga asayaogo aser la world

rankings nung temaba jenjang nung hopta 71 tashi liasü. La career tepeyong nung lai kija asaya 30 tashi koka liasü, kong lai 2018 küm Australian Open koka Grand Slam ka akokba densema lir.

2020 küm January ita Wozniacki-i ajak aoksadakja arishi küm 29buba nung asaya nungi anentsü atema telemtetba agiba sangdonga liasü. Lai la kinungbo aser taoba NBA asayar David Lee den kibong ka tenzüksü asoshi tejangraba aliba ajanga iba telemtetba agia liasü.

Iba sülen lai jala Olivia aser jabaso James na soa bentsüogo.

## FIFA Rankings nung India 100bubai tuogo

**Aami/June 29, 2023 (Agencies):** Brehostibarnü sayaba FIFA World Rankings nung India tebur football team jenjang ka tejakdangi tua 100buba tongtetogo.

Honibarnü SAFF Championship semi-final nung Lebanon kokra India team July ita rangking sayaba mapang maneni tejakdangi atutsü. India-i Intercontinental Cup akokba mapang Lebanon kokatokogo anungji semifinal nunga takok angutsü imlar.

Ita asem tejakdang temaba jenjangi atuba sülen FIFA World Ranking nung Argentina team maneni temaba jenjang nung lir. Australia aser Indonesia na den friendly asaya akokba sülen parnok maneni jenjang memelenshi lir. Top three nung team memelenshi lir aser tanabuba aser tasembuba jenjang nung France aser Brazil lir.

Ajisüaka top three tsünglang nung team tem jenjang kar melenshiogo. England aser Belgium na jenjang

melentepogo aser yamaji Croatia (6th, plus 1) aser Netherlands (7th, minus 1) nata jenjang melentepogo. CONCACAF Nations League champions USA (11th, plus 2) Top 10-i aitsü ana nung lir, kong Spain (10th) masetshi lir, kechiyong parnoki UEFA Nations League kokogo.

Maneni ranking teküboken temelenshi kar atokogo. Wales (35th, minus 9) aser Côte d'Ivoire (51st, minus 6) na jenjang asepzükaluogo aser kasa mapang nung Ukraine (24th, plus 6), Scotland (30th, plus 6) aser Armenia (90th, plus 7) nung tejakdangi tuogo. Slovakia (46th, plus 5), Greece (49th, plus 3) aser Mali (50th, plus 3) nungera Top 50-i iogo aser Mauritania (99th, plus 6) o India (100th, plus 1) nata Top 100-i iogo.

Top 100 tema nung Kazakhstan (104th, plus 8) Togo (122nd, plus 7), Tanzania (123rd, plus 7) aser Moldova (164th, plus 7) nung jenjang kanga junga kümogo.

## Barcelona-i İlkay Gundogan alizükogo



Ilkay Gundogan

**Aami/June 29, 2023 (Agencies):** İlkay Gundogan-i Manchester City toktsüba sülen free agent ka ama Barcelona-i pa alizükogo, ta club sangdong ka ajanga metetdaktsü. Germany nung midfielder yagi küm ana atema tenanzüktepba yangluogo.

Arishi küm 32 tain asayar ya 2025 küm June ita tashi asayatsü aser ano küm ka atsülangtsü atema lenmang sadema lapoka yuogo. Barca-isa, Hombarnü ashiba agi, pa atema buyout clause euro million 400 züngzüka yuogo.

Gundogan lenisüba nung City puri taoba season Premier League, FA Cup aser Champions League akokba sülen pai club toktsüogo. Pa iba club nung küm tenet asaya aser iba mapang pai takok marnok 14 ngutetogo, kong league title pongu densema lir.

"Taoba küm tenet tashi City nungi asayashiba ya kü atema maangka ka liasü aser jangradema asayaogo," ta

Gundogan-i ashi. Pep Guardiola-i 2016 küm City coach mapa agizükba mapang pai mezügbuba Gundogan alizüka liasü. Pa Borussia Dortmund nungi anir aru, kong pai 2012 küm Bundesliga aser German Cup kokogo.

Gundogan City nungi 300 ben dak tema asayaogo aser iba mapang pai goal 60 idaktsü aser assist 40 süja liasü.

City indang director of football Txiki Begiristain-i, Gundogan ya ajak asoshi tajungshiba ka liasü ta ashi.

Kasa mapang nung Barca coach Xavi-i ashiba agi, midfielder tejen Sergio Busquets-i küm 18 sülen club toktsüba sülen Gundogan indang tajangshibatam ya club asoshi kanga tongtibang asütsü.

Barcelona-i taoba season La Liga kokogo, ajisüaka parnok Champions League nung group stage nung tsikatok aser Copa del Rey nunga semifinals nung tsikatok.

## BILEM DANGANG

"Atsügdaker lira lenmang tasen mesapokang."